

## ՀԱՅՏԱՐԱՐՈՒԹՅՈՒՆ

Մենք, քաղաքացիական հասարակության այլ ներկայացուցիչների և փորձագետների հետ համատեղ, Լեռնային Ղարաբաղի հակամարտության կարգավորման «Մինսկի գործընթացի անկախ քաղաքացիական նախաձեռնության» շրջանակներում, 2010 թվականի դեկտեմբերի 8-ին Թբիլիսիում ստորագրեցինք մի հայտարարություն, որով կոչ էինք անում հակամարտող կողմերի ղեկավարություններին՝

- վերջ տալ հակամարտության թեժացմանն ուղղված ռազմատենչ հռետորաբանությանը և քաղաքական ու տեղեկատվական ակցիաներին,
- անհապաղ քայլեր ձեռնարկել հրադադարի ռեժիմի ամրապնդման ու զինված միջադեպերի կանխման նպատակով և ապահովել շփման գծից դիպուկահարների անհապաղ հետ քաշումը,
- հակամարտության կարգավորման հիմնարար նորմերին՝ հիմնված Հելսինկյան եզրափակիչ ակտի հիմնարար սկզբունքների վրա (ուժի չկիրառում, տարածքային ամբողջականություն, ժողովուրդների ինքնորոշման իրավունք և իրավահավասարություն), ավելացնել «վեճերի խաղաղ կարգավորում» սկզբունքը,
- ձեռնամուխ լինել դարաբաղյան հակամարտության կարգավորման «ճանապարհային քարտեզի» մշակմանը:

Ցավոք, նախկինում «Մինսկի գործընթացի անկախ քաղաքացիական նախաձեռնության» կոչերն այդպես էլ հաշվի չեն առնվել և հրադադարի 20-րդ տարին մեր ժողովուրդները դիմավորեցին ոչ թե խաղաղ կարգավորման ճանապարհին, բարի դրացիական հարաբերությունների վերականգնման գործնական խնդիրների լուծման, համագործակցության և տարածաշրջանային ինտեգրման, այլ՝ պաշտոնական բանակցությունների գործընթացում ձևավորված փակուղային իրավիճակի, գորքերի շփման գծում լարվածության աճի և լայնածավալ ռազմական գործողությունների վերսկսման վտանգի մեծացման պայմաններում, որոնք կապված են նաև հետխորհրդային տարածքում սկսված գործընթացների հետ:

Հակամարտությունը արդեն իսկ հանգեցրել է մեծ աղետի՝ տասնյակ հազարավոր մարդկանց մահեր, հարյուր հազարավոր վիրավորներ և հաշմանդամներ, միլիոնից ավելի հարազատ օջախներից զրկվածներ, իսկ երկու ժողովուրդների միջև հակամարտության կարգավորման առաջընթացի բացակայությունը մեծ հիմնախնդիրներ է առաջացրել սոցիալ-տնտեսական բարեկեցության ստեղծման փորձերի, ուժեղ քաղաքացիական հասարակության, օրենքի գերակայության սկզբունքի վրա հիմնված ժողովրդավար պետականության և մարդու իրավունքների և հիմնարար ազատությունների երաշխիքների համար:

Ստեղծված ստատուս քվոն չի կարող շարունակվել, «իրավիճակի սառեցում» տեղի չի ունենում. համարյա ամենօրյա կրակոցներից մարդիկ են զոհվում, ընդլայնվում է

ռազմական բախումների տարածքը, հակամարտության կողմերի միջև աճում է սպառազինությունների մրցավազքը, պետական և քաղաքացիական մակարդակներում հոետորաբանությունն ավելի արմատական է դառնում: Ստատուս քվոյի պահպանման հետագա փորձերը անտարակույս կդառնան նոր վտանգավոր միտումների անբաժան մաս, որոնք սպառնում են ոչ միայն համաեվրոպական անվտանգությանը, այլև՝ մեր երկրների անկախությանն ու ինքնիշխանությանը:

Ստեղծված պայթյունավտանգ իրավիճակում, ինչպես ցույց տվեց շփման գծում բռնության աննախադեպ ալիքն այս տարվա հուլիս-օգոստոս ամիսներին, նույնիսկ հակամարտության կողմերից մեկի թույլ տված աննշան սխալները կարող են օգտագործվել մեզ նոր պատերազմ պարտադրելու համար:

Մենք սատարում ենք ԵԱՀԿ Մինսկի խմբի համանախագահ դեսպան Ջեյմս Ուորլիքի նախաձեռնությունը, որը շարադրված է 2014 թվականի մայիսի 7-ի «Լեոնային Ղարաբաղ. Կարգավորման ուղիներ» զեկույցում, ինչպես նաև Մինսկի խմբի համանախագահների 2014 թվականի մայիսի 12-ի հայտարարությունը: Այդ հավասարակշռված մոտեցման մեջ են պարփակված և՛ հակամարտության կողմերի, և՛ ԵԱՀԿ Մինսկի խմբի անցյալ ու ներկա համանախագահների երկարամյա բանակցությունների աշխատանքի ու փորձի արդյունքները: Գտնում ենք, որ երեք սկզբունքները և նշված վեց բաղադրիչներն իրենցից ներկայացնում են դարաբաղյան հակամարտության կարգավորման ԵԱՀԿ Մինսկի խմբի խաղաղության համաձայնագրի և «Ճանապարհային քարտեզի» գործուն հիմքերը:

Կարծում ենք, որ խաղաղ կարգավորման բանակցային գործընթացը մեր հասարակությանների համար պետք դառնա բաց և թափանցիկ: Այս համատեքստում կոչ ենք անում հրավիրել միջազգային համաժողովներ դարաբաղյան հակամարտության կողմերի իշխանությունների, քաղաքացիական հասարակության և միջազգային կազմակերպությունների ներկայացուցիչների ներգրավմամբ՝ խաղաղ կարգավորման գործընթացի աջակցման և դրա գործնական կիրառման նպատակով: Մենք սատարում ենք Խաղաղության համաձայնագրի իրագործման ընթացքում միջազգային ուժերի օգտագործման գաղափարը և շեշտում ենք, որ միջազգային ուժերի կազմում չեն կարող մտնել ոչ ԵԱՀԿ ՄԽ-ի համանախագահ երկրները, ոչ էլ հակամարտության կողմերին հարևան պետությունները: Այդ համաձայնեցված սկզբունքների գործնական իրականացման համար միջազգային միջնորդությունը պետք է ազատ լինի որևէ աշխարհաքաղաքական կոնյուկտուրային նկատառումից ինչպիսին են ազդեցության ոլորտների համար պայքարը և տարածաշրջանում գերիշխանությունը:

Հրատապ կոչով դիմում ենք ԵԱՀԿ ՄԽ-ի համանախագահող երկրների ղեկավարներին, ինչպես նաև մյուս երկրներին՝ դադարեցնել բոլոր տեսակի հարձակողական զենքերի մատակարարումը դարաբաղյան հակամարտության

կարգավորման տարածաշրջանում: Ռազմական հակամարտության խաղաղ կարգավորումը միայն հնարավոր է հակամարտող կողմերի՝ փոխադարձ զիջումների գնալու պատրաստակամության, առավելապաշտական պահանջներից ու նախապայմաններից հրաժարման, մեր ժողովուրդների ընդհանուր ազգային շահերի գիտակցման, ինչպես նաև՝ միջազգային միջնորդների կողմից դարաբաղյան հակամարտության խաղաղ կարգավորման անկեղծ ցանկության պարագայում:

Դիմում ենք կողմերի քաղաքական ղեկավարություններին, անկախ խաղաղ կարգավորման առանձին դրույթների սկզբունքների տարբեր մեկնաբանություններից, անվերապահորեն ձեռնամուխ լինել դարաբաղյան Խաղաղության համաձայնագրի մշակմանը ԵԱՀԿ ՄԽ-ի համանախագահ ղեսպան Ջեյմս Ուորլիքի ս.թ. մայիսի 7-ի նախաձեռնության և ԵԱՀԿ ՄԽ-ի համանախագահների ս.թ. մայիսի 12-ի հայտարարության հիման վրա:

Կոչ ենք անում հակամարտության բոլոր կողմերի քաղաքացիական հասարակություններին, բոլոր քաղաքական և հասարակական ուժերին դառնալ խաղաղ կարգավորման ակտիվ մասնակից, սկսել անհրաժեշտ փոխզիջումների փնտրտուքը, հրաժարվել առավելապաշտական պահանջներից և ստանձնել դարաբաղյան հակամարտության խաղաղ կարգավորման պատասխանատվության իրենց մասնաբաժինը:

<p><b>Դավիթ Շահնագարյան</b> Արտակարգ և լիազոր ղեսպան 1992-95թթ. Հայաստանի Հանրապետության նախագահի հատուկ հանձնարարություններով ղեսպան</p>	<p><b>Էդար Նամագով</b> Ադրբեջանի Հանրապետության Նախագահի օգնական և քարտուղարության ղեկավար 1993-99թթ.</p>
---	---

**3-ը նոյեմբերի, 2014թ.  
Հելսինկի, Ֆինլանդիա**

**Հայտարարությունը սատարել են՝**

**Արզու Աբդուլևևա**, Հելսինկյան քաղաքացիական ասամբլեա-Ադրբեջան, նախագահ, Օլոֆ Պալմեի խաղաղության մրցանակակիր, ԵՄ և ԱՄՆ կառավարության Մարշալի մրցանակակիր

**Կարեն Օհանջանյան**, Լեռնային Ղարաբաղի «Հելսինկյան նախաձեռնություն-92» կոմիտեի համակարգող

**Նատալյա Մարտիրոսյան**, Հելսինկյան քաղաքացիական ասամբլեա-Հայաստան, նախագահ

**Ալի Աբասով**, պրոֆեսոր, քաղաքական վերլուծաբան

**Զարդուշտ Ալիզադե**, փիլիսոփայության դոկտոր, քաղաքական վերլուծաբան

**Աղասի Ենոքյան**, Քաղաքական և միջազգային հարաբերությունների հայկական կենտրոն, տնօրեն

**Լեյլա Ալինա**, Ազգային և միջազգային հետազոտությունների կենտրոն, քաղաքական վերլուծաբան

**Հայկակ Արշամյան**, Տարածաշրջանային հետազոտությունների կենտրոն, պատմաբան, վերլուծաբան